

PRE CHECO "VÎF"

Cumó ch'al é muart, tanc' a spessearan a staronzâ dut ce ch'al ere fûr dal stamp, par vê un pre Checo oleografic, bon, umil, ubidient. E ancje la glesie furlane, che lu à fat avonde penâ, j darà une man di santitât par dî ch'al ere un dai siei. Invessit pre Checo al ere un dai nestris. In dut. Al e dificil fâsi une idee dal onp, ancje parceche lui nol à lassât scrit dibot nuje, fale lis traduzions. Lui al ere l'onp de peraule vive, de azion, de intuizion. Plui che fâ un discors, al lave indenant a paragons, a massimis, a sprocs. E s'al veve di disij alc a di un, no j scriveve un libri; j diseve dome un "macaco!" che lu copave.

Chei come nô che àn vude la gracie di cognossilu tai momenz plui biei no podaran dismenteâ né la vôs né i vôi né l'estro. Par cheâtris o cirin di dâ une cerce cun chesc' "ricuarz".

Tâl il fî e tâl la mari

S'e jó vere che la scjèle no va lontane dal çoc, cognossint pre Checo si pó vê une idee ancje di puare sô mari. Che à di jessi stade une femenone.

Nus contave che une volte sô mari e jó lade a cjatâlu in seminari. J à parût ch'al fos un fregul sbatut di muse. Alore e à frontât il retôr, bons. Venturin, che j disevin "Vigj Blu" parvie dal colôr dai ocjâi: «Bonsignôr, mi semee che il gno frut al é sbatût di muse!».

«Po no che nol é sbatût! Al sta benon!» j à rispuindût chelâtr.

E jê: «Nol cognossarà migo gno fî miei di me! Jo m'al meni a cjase, che si tiri su».

«Ma no si pó!»

«E cui àjal dite che no si pó?».

«Al é tal regolament».

«E cui àjal fat il regolament?».

«Lu vin fat nó».

«E gno fî lu ài fat jo e m'al meni vie!».

Rivât a cjase, la prime robe j à fate gjavâ la tonie. «Cumó tu le picjs tal claut, fin che no tu tornis jú dopo comedât. Chí si torne come prin».

E si pó dome crodi cetant ch'al gjoldeve su pai prâz e pai boscs di Montenars, libar come i ucêi dal ajar.

"Tu farai piangere la chiesa!"

Si sa che al é stât sinpri onp sigûr e libar nol podeve dî ce che no j

semeave vêr; e ancje nol podeve tasê ce che j semeave vêr. E alore un cavîl seguitif, ancje cui professôrs.

Une dí ti àn inviade une barufe par cantins di morâl. Placerean al bateve la sô e chelâtri si rinpinate tôr befêi di papis e di conceis, ma resons an tirave fûr pocjs avonde.

Viodint che nol rivave a fâlu tasê, il vieli j à dit suspirant: «Figliolo, tu farai piangere la chiesa!». E Placerean, sut: «E lei la farà ridere!».

Capelan par dîs minûz

Pre Checo al veve çucje e in chê volte i plui babios ju mandavin a studiâ a Rome, lassant i berdeis de cure pastorâl a di cheâtris. Peró un sclip di garzonât al scugnive fâlu. E cussì lu nomenàrin capelan.

La prime nomine e fo a Susans.

Si presentà in canoniche ai ultins di Iuj. «O sares il gnuf capelan» dissal. E il plevan: «Tant ben ve'; cussí, il mês di otubar, tu mi darâs une man a fâur dutrine ai fruz».

«D'accordo! Alore si viodarin di chí a doi mês!».

E al sierà la cuistión tornant a cjase.

Alore lu distinàrin capelan a Glemone.

In canoniche, insopn des scjalis, al ere puar Monai, cun tune cuarnadure di fâti algâ il pêl.

«E tu cui sestu?» j domandà.

«O sares il gnûf capelan. Dome ch'al varà di lassâmi lâ a studiâ a Rome».

«Jo no soi d'accordo!» al berlè Monai.

«E jo no soi d'accordo che lui nol seti d'accordo! A riviodilu!» j rispuindé pre Checo.

«Cjale mo: o ài capit che jo e te no fasareassin tele, ma tu mi plâs, parceche tu tu sâs tignî dûr. Alore ti pari vie, ma prime tu às di vignî su a bevi un tai cun me!».

E si son sinpri rispietâz, magari in lontanance. Parceche a vevin crepe e fiât duc' i doi.

Il breviari

Cumó e je ganbiade usance, ma in chê volte, come ai tinps di puar pre Abondio, i predis a vevin di girâ pal païs sinpri cul quadrât e cul breviari. Il breviari al ere intrigôs di dîlu, parceche si veve di passâ ca e la. E penç.

Alore lu vevin spartît in cuatri volums, un par stagjon, e a vevin metûz i segnâi, duc' colorâz. Une robe comude par chel ch'al veve di doprâlu ma

comude ancje par chel ch'al voleve controlâ se un lu diseve o no. Bastave viodi se i segnâi a erin a puest, te sornade e te ore juste. Pre Checo, ch'al lave indenant cu la liturgje orientâl, nol ere masse precîs in chestis robis. Alore ti veve ciatât il sisteme di no fâsi controlâ. Al veve cjolt un breviari unic, par dut l'an, e al veve tajâz duc' i segnâi. Cussi, se un j al viergeve, nol podeve sancirâsi se lu veve dit o no.

Martin Lutâr e sant Antoni di Glemone

Si é sinpri sintût "luteran", ancje s'al ere plui catolic di tanc' catolics. Dome che j plaseve protestâ. E al veve une venerazion par Martin Lutâr ("il nestri san Martin!") par dôs robis che si compagnavin cul so intendo: al veve voltade la Bibie e al veve fate nassi, culturalmentri, la nazion gjermaniche.

I studenz, ch'a savevin di cheste sô passionate pal frari di Wittenberg, un an j àn regalât un cuadri: di une bande al ere sant Antoni di Glemone e di cheâtre Martin Lutâr. «Naturalmentri lu picj de bande di Martin Lutâri» dissal dut gongolant.

E s'e gjoldeve a contâ che, tal taramot al veve pierdût cjase e dut ma al veve salvadis dôs robis che ur tignive tant: i ucêi e il cuadri di Martin Lutâr.

«Tignîlu cont pe cjase gnove!» al diseve inluminansi.

"I permes jo ju ài di adalt!"

No jó une novitât che, in barbe 'es promessis dal vescu! Battísti, la messe par furlan e reste inproibide. «Al covente il permes di Rome!» a van disint cun tun coragjo di leons.

Pre Checo al veve vûz permes plui in alt, cuanche al veve tacade la messe par furlan, al '70.

«La prime messe le ài dite sul Cuarnam. E il Cuarnam al e plui alt dal Sinai. Pa la cuâl mi sint dispegnât de vuestre leç» ur spiegave a di chêi de curie.

E par chês âtris messis al veve vût un permes ancjemó plui speciâl.

«Vuâtris o spietais il permes dal pape e jo lu ài vût ancjemó te dî des Pentecostis, diretamentri dal Spirtu Santi» ur spiegave a di chêi cjastrons.

La tatiche dai pulitics

Ancje se daûr de casse al à vût plui di un pulitic, nol é che, di vîf, j vetín dade masse udience.

Une volte, in Valdoste, al à spiegade la tatiche dai pulitics tai confronz di chêi ch'a si batin pai diriz des minorancis.

«E àn tre scjalins. Il prin al é chel di fâti pore, cun ogni sorte di ricat. S'a puedin, ti copin apene nassût Se no rivin a copâti, alore a tachin cul secont sisteme: crin di comprâti. O cun bêz o cun puesc' o cun titui. Se tu rivis a resisti ancje a di cheste seconde tentazion, a metin in moviment la tierce. A cjapin la tô idee, s'e fasin sô e po le sassínin. Cussí ti ruvínin dut ce che tu às fat».

Checo al à provade cheste "teorie" su la sô piel. La curie j à gjavade la scuele di religion, crodint di cjapâlu cu la fan. Po lu àn ingolosít cun mil mignagnulis. Tal ultin a erin deventâz duc' furlans e a lavin duc' a cjapâ su il lidric plantât di pre Checo. La cuintrprove le vin a Aquilee, a Einsiedeln, te Filologjche. Cuant mai si àjal vude une sfluridure come cumó di iniziativis par un furlan "facoltatif"?

"Provareis!"

Pre Checo le veve su, soredu, cui democristians. Parceche lu vevin lanbicât di plui (Toros cul câs de Mozion) e parceche a vevin la responsabilitât plui grande dal tradiment dal Friûl te cuistion de autonomie. Lui al veve tal cjâf un stamp di Friûl a uso Sud-Tirol e nol rivave a dâsi pâs che in Friûl il partit catolic nol ves rivât a inmaneâ une sorte di Volkspartei. E vares disberdeât il câs-Friûl. Invessit o nuje o cuintri.

E pre Checo si é butât "a çanpe", lui onp di mieç o di gjestre. Par disperazion cuintri de DC.

Une dí, in borc di Trep, lu à frontât Mizzau, ch'al ere come ch'al é cumó ma no a nível europeo.

«Siché si seis butâz cun chêi di çanpe? No saveiso che i comunisc' a son cuintri de religion, che in Russie a stan piês che no in Americhe...» e jú il disco. Finâl: «Provareis!».

Pre Checo, che lu veve scoltât fint in chel moment cence bati cee, al à gjavât il toscan e j à dit: «Cheâtris no ju vin provâz. Peró vuâtris us vin provâz, ancje masse!».

L'ecumenisin

Pre Checo al lave in brût dome cuanche al podeve funzionâ, in domo a Udin, te liturgje orientâl. Al jentrave cun religjon, si insegnave 'e mode russe, si meteve su la lôr munture e al diseve dut braurôs: «Cumó mo mi sint veramentri catolic!».

A ere la setemane dal ecumenisin, cuanche si à di preâ pe unitât de glesie. Ma Checo al veve za la sô ressipe: «Nol covente preâ. Co lis

divisions a son stadis fatis par colpe dal pape di Rome, baste tirâlu vie lui e si torne in buinis».

Al spietave un lanp, par viodi l'efiet dal so sprolic, e po al tornave a reongi: «Bisugne preâ par che i lontans a tornin dongje, ma no cun masse cunvinzion. Che nol ves di sucedi che il Spirtu Sant, par fâ l'unitât de glesie, nus fases cjatâ duc' di cheâtre bande!».

Cualchi volte, cuanche al ere plui cjamât, nus diseve: «Anìn jú a Alessandrie d'Egit, dal patriarche Shenudà. Si metin intôr un grimâl dai lôr e si fasín fâ vescui. Si le cunbine tune sornade. Po o tornin su di Battistí e lui, che cumó nus fâs la malevite, al scuen, par resons di ecumenisìn, dânum di gustâ, di cene e di durmî tal so palac. Parceche nol é di vuè che la glesie catoliche ur fâs malegraciis a di chêi dentri e plait a di chêi fûr».

Il gneurut

Te tribú dal predessam, and'è un che al é passât par "gneurut".

Zovin e plen di passion, al à crodût di jessi grant dome parceche al ere a servî un grant. E une dí si é sintût in dirit di menaçâ pre Checo: «Viôt cemut che tu fevelis, che no tu vessis di là a finîle malamentri!».

Checo lu à cjalât par un minut cence disij verbo. Po j à dit «Pree il to Signôr che tu sês un snacai, senó ti vares smaltât su pal mûr. Jo o ài sinpri fat il braconîr, ma no mi soi mai permetût di tràjur ai gneurs sot dal chilo».

"Tu tu sês amancul gôt!"

Te senblee dal '75, pe prime volte te storie, si à fevelât par furlan tune cunvigne ufcial. E il scandal al é stât orent. Parceche duc' e àn cjapât il fevelâ par furlan come un at di fede tal Moviment Friûl, cence rindisi cont che, cun tune logjche cussí bastarde, il fevelâ par talian al deventave un at di fede te DC.

Di front di chest pericul, che la glesie di Udin e deventas separatiste, antitaliane e antipapâl (par lôr al ere dut un), e àn tacât a businâ il lôr patriotisin. Un dai plui ferbinz al ere pre Rinaldo di Sant Aroc: «O soi d'accordo in dut cun te, pre Checo, ma no tu puedis dineâ che nó o sitalians!».

Pre Checo lu à cjalât in ghigne e po al à petade une grande ridadone: «Instant tu, par cont di muse, tu sês amancul gôt!».

La letare anonime

Tal funerâl di Placerean and'ere ungrum di predis. Salacôr a varessin fat miei a sparagnâsi la fadie dal mortori e a tratâlu miei di vîf. Ma aromai ce ch'al é stât al é stât.

Dai tanc' che j davin ju, no mancjavin chêi che, par amôr di Diu, j mandavin letaris anonimis.

Une dí j é rivade une che lu menacave di displasêts cu la cuesture, se nol finive di remenâ glesie e partît. E finive cussí: «E poi non dovresti sputare nel piatto che mangi!».

Alore pre Checo si é inrabiât: «Intant o mangj tal gno plat, che m'e vuadagni insegnant filusufie. E po certe int a vares di stâ atente, cuanche a mande letaris anonimis, a no tradîsi masse. Chel chî al é di sigûr un gno compagn di scuele, ch'al e in curie. O sai parceche ancje a scuele al sbalgjave sinpri cui pronoms relatifs!».

E riferinsi a dut il furduscjament fra la curie e la cuesture par metilu a mâl, al diseve: «Fintremai che cuesture si lu scrif cu la c di curie, no si va indenant ben!».

I nestris Sanz si mertin vot!

Cuanche al à fat il messâl, dopo dal taramot, pre Checo al à cjapât duc' i "beâz" dal nestri lunari e ju à faz sanz, scomençant dal nestri grant patriarcje Bertrant.

Naturalmentri j àn fate la croniche, parceche e ere une robe che j tocjave dome 'e congregazion di Rome. Ma pre Checo ur à metût il cûr in pâs disint che «si pó sinpri dâj vot a di un che a Rome j àn dât sis».

Un bon cjan al fâs par cincuante pioris

Si ere dal '75, cuanche la glesie furlane e à vût un moment di gracie cu la senblee dai predis. E jó stade la senblee dal "tornâ cu la int" e des firmis pe universitât. Un grant moment, ancje se dopo al é lât in vacje, amancul a nivel uficiâl. E te senblee e àn fat di prin pre Pauli e pre Checo.

Si stave preparant chest fat straordenari de nestre glesie e si veve un freghenin di sbigule. O erin in pôs e il podê nol ere di sigûr de nestre bande.

Le varessin vude grivie, soredui tai prejudissi di tanc' predis e pes pressions dai democristians.

Al è in chê volte che pre Checo nus à dât spirt, a Vençon, disintnus che «un bon cjan al fâs par cincuante pioris». E i faz j àn dade reson.

Il consei

Tai dîs de senblee, si ere duc' infogâz par puartâ indenant lis nestris reson. E un predi che cumó al va a la grande in fat di musiche si é permetût di frontâ pre Checo.

«Puedio dâti un consei?» j à domandât tal curtîl dal seminari.

«Parcé no?» j à rispuindût pre Checo.

«Mi semee che tu sbalgjs pulitiche. Cîr di cujetâti e di frenâ un tic la lenghe».

Pre Checo lu à scoltât, po lu à cjalât ben tai vîoi e j à dit «Grassie dal consei che tu mi às dât. E cumó podaressio dâti jo un consei a ti?».

«Parcé no?» j à fat chelâtri. «No stà mai dâ conseis cuanche no t'ai domàndin!».

I esanps a Padue

Placerean al saveve che, disint mât dal vescul e de DC, nol podeve fâsi inlusions par cont di scuele. O di vinars o di sabide, lu varessin parât fûr. «E un che a misdî al à fan – al diseve - nol pó berghelâ. La prime libertât e jé chê dal tacuìn».

Cussí si notà a Padue, in filosofie.

Al partive cul treно, al durmive di Udin fint a Padue e lavie ti faseve un o doi esanps. Po al tornave a indurmidîsi e al rivave a Udin fresc come un sclopon e cul abonament al trente.

Alore j domandavin: «Ma cemût fastu a cjapâ sinpri trente e a durmî lant e tornant?».

«Sint mo. Tu savarâs ben che in filosofie si pó dî ce che si à voe, parceche i filosofos e àn dit di dut e lu àn dit tun mût cussí ingredeât che ognun al pó tirâle di ce bande ch'al ûl. Baste ch'al seti sigûr e che nol moli. Jo mi met alî e o voi indenant cu la mê; chelâtri al dîs la sô. Chel ch'al mole par prin le à pierdude. Al é clâr che chel no soi jo. Naturalmentri tu às di vê une buine culture gjenerâl, un bon telâr. Il rest a son najnis e inpinions, e une e vâl cheâtre».

La puntualitât

Pre Checo nol à vude mai puntualitât. E nancje nol voleve vêle. Seti pal so naturâl salvadi seti par une reson "filosofiche". «No vin di murî par masse organisazion!» al diseve par fâsi perdonâ. Une volte sole al é rivât prin di cheâtris; tun matrimoni. Al veve sornade libare e, a fuarce di viodi te vetrine sinpri chê letare, al é lât a viergile. Al ere invidât a di

un maridaç tun païs dal Friûl, pai 27 di dicenbar, 'es 11. Dopo messe, al vares vût ancje il gustâ pajât. E cussí al parti adorone.

A vegnin dîs e miege e nol sint a sunâ messe. Al mancje un cuart e nuje. A undis al ere un tic sorepinsîr. E sustât ancje, parceche al became. «E dopo a disin che no soi puntuâl jo!» al rugnave, fasint dute une pojate cul toscan. A undis e un cuart al à tacât a sacraboltâ: «O soi vignût vulintîr - dissal - ma cuanche a rivin an sintin cuatri!».

Ma no rivavin. Stuf e inbramît, al à tirade fûr la letare e al à tornât a lei: 27 di dicenbar 'es 11. Dut just Dome ch'al ere rivât cun tun an di ritart.

Furlan ancje tal gustâ

Checo al veve buine bocje. Nol é ch'al vés mangjât tant, ma al parave ju di dut, come il purcit. Une robe sole no le à mai cjanide: i pomidôros. «Par une cuistion etniche» al diseve.

Cui vescui

Te sô vite di predi al à vût dafâ cun tre vescui: cun Nujâr, cun Zafonât e cun Battisti. E si pó dî che plui frez a erin i rapuarz uficiâi e plui al veve pussibilitât di fâ. E l'incontrâr. Dite par furlan, mancul lu sbilissavin e plui j davin fiducie e responsabilitât

Nujâr, par esenpli, ch'al ere chel cragnin che duc' s'al visin, cîl e regule e gjerarchie, lu à nomenât professôr di religjon al Stellini e assistent da l'Acli, cuanche l'Azion Catoliche e veve ancjemó fuarce.

Cun Zafonât e àn vude, si pó dí, lote continue. Prime cu la mozion dal clero e po cu la messe par furlan. Poben sot di lui al à vût stât a fâ conferensis par dute la diocesi e cors di teologje e filosofie ancje in sale Brusadule.

Battisti al à tacât a morosâ cun lui apene rivât. E difat a scrivevin che il gnûf vescul al ere stât cjapât tes vuiscjadis di pre Checo. Une armonie, une stime e un afiet plui che no fradis. E pachis pes spalis po nancje di rivâ a contâlis. Epûr s'al é stât un tînp che pre Checo al é stât metût di bande al é propit chest. Si pó dí che dopo i lusôrs de senblee e dal viaç a Einsiedeln, pre Checo nol é stât né interpellât né clamât. E ancje te cuistion de Bibie par furlan, l'inpegno nol é lât plui in là de cjacare. Grant fum, ma macarons pôs.


E pensâ che un at di stime (oltridut meretât e strameretât) j vares fat ben al cûr, massime cuanche si viodeve a lâ denant-daûr. Cumó forsit a riscjaran di canonisâlu.

Dâ par sot

La grande politiche democristiane e jé sinpri stade filo romane e antiautonomistiche. Peró par fâ tasê pre Checo e par ingraciâsi la trupe dai furlans, j conseavin grande prudense. «No tu às di pratindi la lune - j disevin -. Cîr di no jessi masse trist cun nó e soredu di no butâti a çanpe e nó, par sot, ti din dut ce che t'ûs".

«Ce che si dà par sot, par sot si pó ancje tirâlu vie» al rispuindeve pre Checo te sô sapiense cuinçade cu la grande speriere.

Pre Checo Placereani (1920 – 1986)



TESTAMENT DI PRE CHECO

O intint di passâ di cheste vite in te fede di Gjesù Crist ch'e si e sacrificât par me secont la dutrine de glesie dal Ocident in te tradizion de glesie patriarchâl di Aquilee che à nudrît la mê fede: in cheste fede o ài vivut e o intint, come ch'o ài dit, di murî.

O domandi perdon a Diu di duc' i miei pecjâz e ju rimet al podê, come che dìsin, des clâfs che Crist j à dât a la sô glesie.

Se o ài ofindût cualchidun, cun umiltât o domandi perdon.

Montenars, 22.3.1983